

Bajet 2023 fokus usaha perkasa ekonomi digital

Bajet 2023 fokus usaha perkasa ekonomi digital

Kota Bharu: Bajet 2023 yang akan dibentangkan 28 Oktober ini, turut menumpukan usaha ke arah memperkasakan ekonomi digital, khususnya kepada masyarakat luar bandar.

Timbalan Menteri Kewangan I, Datuk Mohd Shahar Abdullah, berkata tindakan itu bagi memastikan golongan itu tidak tercicir dalam mengaplikasikan kemudahan teknologi dalam mengembangkan sumber ekonomi mereka.

Katanya, prospek ekonomi digital semakin berkembang sejak kelakangan ini khususnya penggunaan teknologi dan aplikasi dalam urusan perniagaan antaranya penggunaan e-dagang.

"Kita dapati pendapatan melalui e-dagang meningkat 7.7 peratus kepada RM288.2 bilion pada suku kedua tahun ini berbanding suku kedua tahun lalu hanya RM267.2 bilion.

"Kita yakin prospek perniagaan lebih besar jika menggunakan aplikasi digital, jadi kita buat persembaan bukan hanya di bandar, tetapi juga luar bandar seiring dengan perkembangan teknologi,"

katanya ketika ditemui dalam Program Merdeka@Komuniti Keluarga Malaysia di Sekolah Kebangsaan Kadok, dekat sini, semalam.

Shahar berkata, Kementerian Kewangan akan melihat bagaimana data itu boleh diterjemah pada peringkat ekonomi luar bandar.

Katanya, Jabatan Perangkaan Malaysia juga merekodkan jumlah transaksi e-dagang pada 2021 adalah RM1.09 trilion, meningkat 21.8 peratus berbanding RM896.4 bilion pada 2020.

"Saiz pasaran e-dagang berkembang pesat sejak beberapa tahun ini dan kita jangka akan memiliki saiz pasaran e-dagang RM1.65 trilion menjelang 2025," katanya.

Katanya, oleh itu, pihaknya mengadakan kunjungan ke seluruh negara bagi melihat kesediaan masyarakat mengaplikasikan digital dalam perniagaan mereka terutamanya masyarakat di kampung.

Shahar berkata, bajet 2023 juga akan meneliti pelaksanaan subsidi kepenggunaan selain langkah drastik memulihkan ekonomi negara.